

ՆԱԳԱՍԱԿԻԻ ԾՈՅԸ

ՅՈՒՆԻՍԻ առաւօտը նոր էր ծագում, երբ մեր առջեւը
ծովի մէջ նկարեցին ճապոնական լեռների անորոշ գծերը:

Առաւօտը թարմութիւն ու զով էր շնչում:

Եւ կուրծքը ազատ ու թեթեւ էր շունչ քաշում:

Անընդհատ շարքով ձգւում էին սարերը, մեր ամեն
շարժումին նկատելի կերպով անելով, մինչեւ որ երկու կողմից
մեզ բոլորովին մէջ առան:

Մտանք Նագասակիի ծոցը, Ճապոնի նախադուռը:

Սքանչելի է այդ ծոցը:

Նա սուր գալարուն օձի պէս խորը խրւում է ցամաքի մէջ
եւ ձեզ մի անգամից փոխադրում է մի այլ, ուրոյն աշխարհ,
ուր ամեն-ինչ զարմանք է պատճառում ձեր աչքերին իր
մինիատիւր չափերով:

Բաց ծովը թողնելուց յետոյ շոգենաւը մտնում է նեղ ու
երկար նեղուցը եւ առաջ է սողում բլրոտ ու անտառապատ
մանրիկ կղզեակների ամբողջ մի լաբիրինտի միջով:

Կանաչ պուրակների անդրադարձումները իրար կցւում
են ջրի մէջ, ծածկում են ծովի ամբողջ մակերեսը՝ ջրի մէջ մի
նոր ցոլածու անտառ կազմելով:

Շոգենաւը առաջ է գնում այդ իրար հիւսող կանաչի
խիտ ցանցի միջով, յամառ ու անխնայ պատռտելով նրան:

Կղզեակները առաջ են վազում աջից, ձախից, դէմ են
տալիս իրանց կուրծքը նրա ճամփին, կարծես ուզում են
առաջը կտրեն, կանգնեցնեն շոգենաւի արագ ընթացքը:
Բայց յանկարծ նորից բացւում է բարակ նեղուցը — եւ նորից
առջեւդ զմրուխտ կղզիներ: